

## Ekwo, Jémusu deru

<sup>1</sup> Mbèdua, bụ Jémusu, bụ nwozi kẹ Nchileke; mę nwozi kẹ Nnajiufu, bụ Jisosu Kuráyisutu ekele ndu kẹ Nchileke, dzuru mgboko ekele.

### *Ekwekwe; mę mmamiphe*

<sup>2</sup> Unwunna mu; teke iphe dụ l'oga l'oga byaru tẹ ya data unu; unu wotaje iya t'ọ bụru iphe ote ẹswa; <sup>3</sup> kẹ l'unu mawaru l'a -data unu adata kẹ ekwekwe, unu kweru bẹ unu e-shi iya mụta ọtaru iphe nshi. <sup>4</sup> Unu takpẹlẹphu nshi tafu iya l'ishi; ẹge unu a-duebe mma; dzukwaaphu oke ẹge ẹ tọo dudu iphe a-phodu unu l'ẹhu. <sup>5</sup> O -nweru l'unu ha onye mmamiphe pehuru; t'onye ono sụ Nchileke t'ọ nụ iya mmamiphe. Ọo-nụ iya ẹya; kẹle Nchileke bụ o-me-l'uko; l'egudeje obu iphoro anụ onyemonye ọbule iphe ọ sụru t'ọ nụ iya. <sup>6</sup> Ọlobu; t'onye ono kwetakwa l'iphe ookfu tẹ Nchileke nụ iya bẹ ọo-nụ iya. T'obu ba agbakwa iya ẹbo; l'onye obu agba ẹbo dukwa l'ọ bụ akpara-mini eze ẹnyimu, bụ pherephere anọduje atunga iya. Ọ -turu iya jee ifu; yọ turu iya laa azu. <sup>7</sup> T'egbe onye ono ba arikwa l'o nweru iphe ya a-nata l'ẹka Nnajiufu; <sup>8</sup> kẹ l'onye egomunggo agba ẹbo te evudoshijekwa ike l'iphe bụ iphe oome ememe.

### *Ụkpa; mę ẹku*

<sup>9</sup> Tẹ nwanna, akpa ụkpa saje nsasa k'emeli, Nchileke meliru iya. <sup>10</sup> T'onye ọphu bu oke amadu sajekwaphu nsasa me Nchileke -meda iya. Okfu l'onye ono e-rifu l'ọ bu igu oshi; <sup>11</sup> ke l'ọbuje: enyanwu -haa; wata ochishi ike; ewu anwua kpa; igu iya erishihu. Mma iya agvu. Ono bu ege oke amadu a-gbabuhukwaphu l'eke ọono le mgbaphe.

### *Adata yele onwu eye*

<sup>12</sup> Onu-oma bu k'onye taru nshi teke iphe-adata dakfutaru iya; okfu le teke a datatsuaru iya; to da; be aa-nu iya ndzu, bu obunggo, Nchileke suru le ya e-bu ndu, yeri iya obu. <sup>13</sup> Oo ya bu; onye iphe-adata dakfutaru; ome ejo iphe -wata iya agugu; t'onye ono ba asukwa l'oo Nchileke enwu iya eye te ya mee ejo iphe. Le to dukwa onye Nchileke enwuje eye t'o mee ejo iphe; to du onye enwu Nchileke eye t'o mee ejo iphe. <sup>14</sup> O bu ome ejo iphe, agu madzu edetaje onye obu ye; ejo iphe ono anmata iya l'onya. <sup>15</sup> Teke egu ejo iphe ono tsutaru ime; yo mua iphe du eji. Iphe du eji ono -kalephu; yo mua anwuhu.

<sup>16</sup> Unwunna mu, mu yeri obu; unu be eshiswekwa uzo. <sup>17</sup> Iphe, bu iphe, aanu anunu, du mma; me iphe ewoma, e-te nweddu ntupo bukwa l'imigwe b'o shikota. O shi l'eka Nna, meshiru iphoru, no l'imigwe; bu iya bu Nna ophu e-te chinyajedua echichi; nyihu l'ọ bu enyanwu; k'ophu aa-su l'ọ -nyihu be ọchi a-gbaa. <sup>18</sup> O chiru obu iya; gude okfu ono, bu okpobe okfu ono mua ayi t'ayi buru ndu odungu l'iphe bu iphe o keru ekeke.

*Ọnu-íphe-lẹ-nchì;  
mẹ ememe iya*

<sup>19</sup> Ọnwunna mu, mu yeru obu; unu nyatakwa ọwaa: T'onyenọnu bụkwaru onye egebejeodu nchì; t'íphe eekfu doo ya ẹnya; ẹmanu yo yede iya ọnu. T'onye ono ba abụkwa onye obu-ọku; <sup>20</sup> kẹ l'íphe eeme l'ẹhu-eghughu ta bụkwa íphe vudo nhamunha l'ifu Nchileke. <sup>21</sup> Ọo ya bụ; unu shi ishi lanu tufu onwunu íphe bụ umere, du oyi; mẹ íphe bụ íphe ashì, unu eme; zia obu l'alì nata okfu ono, a kwaru l'ime ọkpoma unu l'ọ bụ onye kuru akpuru íphe ono. Ọ kwa okfu ono a-du ike dzofuta unu.

<sup>22</sup> Ọlobu: unu bụkwaru ndu eme okfu ono ememe; unu ba abụkwaru ndu anu iya anunu nkinyi iya; l'ono bụkwa ome onwunu eswe. <sup>23</sup> L'onye anulephu okfu ono; too me iya ememe yekwaru nwoke, eleje ẹge ifu gbaru iya l'onyo; <sup>24</sup> o -lege l'iya phu; yọ paru iya togbo lufushia; zahaakwaphu ẹge ya shi gbaa. <sup>25</sup> Obenu l'onye enyoje ekemu ono, ẹ-te nwedu ntujo ono; mbu ekemu ono, emeje t'e nweru onwonye ono; o -fuberu iya ifu tekenteke; ọphu 'ọ budu ọ-nutsua-ọ-nọ-kirishia; ọ -buru onye emeje iya ememe; onye ono bẹ Nchileke e-gude k'íphe oome ọgoru ọnu.

<sup>26</sup> Onye ari lẹ ya bụ onye kẹ Nchileke l'ẹ bọo taje ire iya ẹra; onye ono bụkwa eswe bẹ oome onwiya. Onye ono bẹ kẹ Nchileke ọphu oome bụkwa íphe mmanu. <sup>27</sup> Obenu l'onye kẹ Nchileke ọphu Nchileke, bụ Nna kweru l'ọ bụ ọkpobe iya; buru ọphu ẹ te merudu emeru bụ: ọkwo ndu a

tõru ogbe lẹ mkpa; oyeru unwanyi, mma tufuru ẹka; ọwaa osefu ẹka l'ẹjo iphe kẹ mgboko.

## 2

### *Ọnma ọkwa kẹ ọbo madzụ ẹbo*

<sup>1</sup> Unwunna mu; t'unubedua, bu ndu kweru kẹ Nnajiufu ayi, bu Jisosu Kuráyisutu; mbu Nnajiufu, du biribiri; unu ba abojekwa madzụ ẹbo. <sup>2</sup> T'a -sụ l'umadzu ẹbo bataru lẹ ndzuko unu; onye lanu bu oke amadu, gba echí-mkpola; bya akwaa onwiya bugebe; onye ophu aburu onye ukpa; yee nkaraba uwe. <sup>3</sup> Teke unu ka okwabe onye ophu kwaru ngwa phu ugu; su iya: "T'ọ tokwa ẹhu;" bya ekoshi iya oshi oonodu; bya asu onye k'ukpa phu: "T'o vudo l'ẹke ono;" m'ọ kwanu: "T'ọ bya anodu l'alị l'iku okpa mu ẹke-a;" <sup>4</sup> to du iya bu l'ikpe nmaru unu; kẹ l'unu abowa madzụ ẹbo l'ime onwunu; bya egude ẹjo okpoma ekpe ikpe.

<sup>5</sup> Unu gebeduduphu nchi; unwunna mu, mu yeru obu: ?to budunua ndu ukpa lẹ mgboko-a be Nchileke fotaru t'ephẹ buru ndu e-shi l'ekwekwe, ephe kweru; nweru iphe l'ifu Nchileke; bukwaruphu ndu e-nweru ẹke o bu eze, bu iphe o suru lẹ ya a-nu ndu yeru iya obu-a? <sup>6</sup> Obenu l'ẹ to nwedu iphe unu guberu ndu ukpa. ?To budunua ndu oke amadu anoduje akpa unu ẹhu-a? ?To budunua ephe akpujeru unu je edobe l'ifu ndu ikpe-e! <sup>7</sup> ?To budunua ephe anoduje ekfubyishi ẹgiri epha ono, unu aza ono ekfubyishi?

8 Teke unu emewa ekemu ono, shi l'èka Nchileke, bụ eze ono; bẹ unu emewa ọhuma, bụ iya bụ ekemu ono, nọ l'èkwo okfu Nchileke ono, sụru: “T'i yeru madzụ ibe ngu obu ẹge i yeru onwongu.” 9 Obenu l'ọ -bụru l'unu abọje madzụ ẹbo bẹ unu emekwa ẹjo iphe; ekemu an-makwaphu unu ikpe l'ọ bụ ndu mebyiru ekemu. 10 L'onye mekotaru iphe ekemu ono kfuru l'ọ ha; mephodo iya nanụ bẹ ikpe nmaakwaru l'ọ mebyikotawaru ekemu ono l'ọ ha. 11 L'ọ bụkwaphu onye ono, sụru t'ẹ b'i rishi ogori; sụru t'ẹ b'i gbushi ọchi. Ọ -bụru l'ẹ tii ridu ogori; l'egbu ọchi; b'i bụakwa onye emebyi ekemu. 12 Ọo ya bụ t'unu kfufe okfu; unu emeje umere l'ọ bụ ndu, ee-mekochaa gude ekemu ono, emeje t'e nweru onwonye ono kpee ikpe. 13 L'onye ta aphuduru ibe iya imiko bẹ Nchileke ta aphukwaru imiko mbọku ono, oo-kpe ikpe ono. Obenu l'onye aphujeru madzụ imiko ta atsuhedu ikpe Nchileke egvu.

### *Iphe bụ l'e kweru kẹ Nchileke*

14 Ụnwunna mu; ?nanụkpo uru, ọo-baru onye sụru lẹ ya kweru kẹ Nchileke; ọphu ookoshidu iya l'umere iya? Egbe ekwekwe ono; ?ọo-dzọfuta iya tọo? 15 Ọ -bụru lẹ nwanna ngu kẹ nwoke m'ọ bụ kẹ nwanyi bẹ agbawa-a ọtu; tọ phụ nri kpua akpo; 16 onye lanụ l'ime unu asụ iya: “T'ọ tọkwa ẹhu-o! T'ọ laa je anyaru ọku; rijia ẹpho”; l'ẹ b'ọ nụ iya iphe bụ mkpa ẹhu iya; ?bụ egbe uru ngunu bẹ nọkpoo l'egbe iphe ono? 17 Ọ bụ ẹge ono bẹ ekwekwe dụ. Ekwekwe, e kweru kẹ

Nchileke; ophu eekoshidu iya l'umere bẹ bukwa iphe nwuhuru anwuhu l'onwiya.

<sup>18</sup> T'e wota iya l'o -nweru onye sūru mu: "L'onye owaaw kwekwaru kẹ Nchileke; umere k'onye ophunanu adu ugu;" iphe mu e-kfuru iya bu: "T'o koshiedu mu ekwekwe, o kweru kẹ Nchileke; m'o -koshidu mu iya l'umere iya. Mbɛdua e-gudekwanu umere mu koshi iya lẹ mu kweru kẹ Nchileke." <sup>19</sup> I kweru lẹ Nchileke bu Nchileke lanu; nggu emekwaa osuma. O kwa ege ono bẹ ogvu kwegbaaru; gude iya nmagbaru ruuru. <sup>20</sup> Olobu; nggube onye mmanu-a; ? iimekpo t'a karu ngu akaru l'ekwekwe, e kweru kẹ Nchileke; ophu eekoshidu iya l'umere bu iphe iphoro to? <sup>21</sup> ?Nanu ege onye iche ayi; mbu Ebirihamu gude buru onye doberu aka ndoo l'ifu Nchileke? O shi l'iphe o meru. L'o gude Ayizaku, bu nwa iya je egbu tẹ ya gude charu Nchileke aja l'anya-ngweja. <sup>22</sup> ?Unu ta phudu ege ekwekwe, o kweru kẹ Nchileke yele ememe iya dagbaru? Ekwekwe, o kweru bẹ iphe ono, o meru ono koshiru l'ekwekwe ono dzuru oke. <sup>23</sup> Oo ya bu ege iphe e deru l'ekwo okfu Nchileke eree, e deru; su: "Lẹ Ebirihamu kweru kẹ Nchileke; Nchileke aguru iya aja l'odobekaka-ndo; gu ya onya yebe Nchileke." <sup>24</sup> Unu phukwa l'oo l'umere madzu b'e gude agu iya l'onye doberu aka ndoo; e to bukwa ekwekwe nwenkinyi iya.

<sup>25</sup> O kwaphu ege kẹ nwanyi okpara ono; mbu Rehabu du ndono. O kwaphu umere iya kpataru iphe Nchileke guru iya l'onye doberu aka ndoo;

kẹ l'o kweru t'ẹphe bata mbụ ndu Ju, e ziru ozi; bya eyeru ẹphe ẹka; ẹphe eshia ụzo ọdo laa.

<sup>26</sup> Ọo ya bụ l'ọo ẹge madzụ, ume ta nọdu bụ iphe nwuhuru anwuhu bụ ẹge ekwekwe, e kweru kẹ Nchileke; ọphu eekoshidu iya l'umere bukwapu iphe, nwuhuru anwuhu.

### 3

#### *Ire bu ọgu*

<sup>1</sup> Ụnwunna mu; unu ba adukwa l'igwe buru ndu ezije iphe. L'unu marua lẹ ayibedua, ezije iphe-a bẹ Nchileke a-kakwa okpeshi ikpe ike.

<sup>2</sup> Ayi l'ayi ha eshisweje ụzo l'igweligwe. Ọ kwa onye te kfuswebua okfu bẹ dọberu mma. Ọ bụ egbe onye ono akpadekotaje onwiya.

<sup>3</sup> Ọ -buru l'ayi egudeje igwe ọnu-inya; gagbabe inya ọnu t'o meje iphe ayi sūru t'o mee bẹ ayi eshije ẹge ono alọ-zị inya ọbu t'o shia ẹke ayi tọberu. <sup>4</sup> Ọdo bụ ụgbo-mini, bụ pherephere anọduje eme iya; yọo gba. Unu lewaru ẹge ọ habe nshinu; yọ buru oke pherephere anọduje apa iya l'eje; ọle ọ kwa nwa bakpabakpa eku-ụgbo bẹ eegudeje anga iya t'o shia ẹke onye ishi, anga iya nū gọberu.

<sup>5</sup> Ọ kwaphu ẹge ono bẹ ire bụ nwiphe nshii, motaru madzụ l'ẹhu. Ọle ọonoduje etu onwiya ikpa. ?Unu phuru ẹge ẹgbudu habe nshinu l'echi-ẹgu? Obenu l'ọo akpuru ichechọku lanu adzujẹ obotẹgu. <sup>6</sup> Ire bụ akpuru ichechọku. Ire nọchiru ẹnya iphe bụ ẹjo iphe, nọ lẹ mgboko-a l'ẹhu ayi. Ire ekfurushije ugwehu madzụ mgburumburu; l'alọtajekwapu ọku alị-maa;

tsobe lẹ ndzụ madzụ; yọ dzụa ya dzụfu. O shijelephu teke a mụru onye ono dzụa jeye teke ọo-nọ-bebe.

<sup>7</sup> E tọ dudu egbe anụ-egu-egbudu; m'ọ bu nwenu; ọdumeka buru unwu anụ, awụ awụwu l'ali; m'ọ bukwanu unwu iphe, bu lẹ mini, ẹ ta agọ-tajeghedu agọta; yo buru l'ufu; tọ dukwa nụ ọphu ẹ ta gọtawaru; yo buru l'ufu. <sup>8</sup> Obenu l'ire ta dudu madzụ, tsuru iya agọta. O bu ẹjo iphe ẹ-te kwedu ogude ẹka; tẹmanu b'ọ dū l'ọ bu ézẹ ẹjo agwọ, ẹ-tee dobejedu onye ọ taru ndzụ.

<sup>9</sup> O kwa ire ono bẹ ayi gude aja Nchileke ono, bu Nna bya aburu Nnajiufu ono ajaja. O kwa iya phụ bẹ ayi gude atụ ibe ayi ọnu; mbukwa madzụ ọphu Nchileke meru; yọ dū l'ọ bu yẹbe Nchileke. <sup>10</sup> O bu ọnu ono kwaphu bẹ ọgo ọnu-ọma shi; mburọnu eshikwa iya phụ. Unwunna mu; ẹ tọ bukwa ẹge ono b'ọ gbaru t'ọ dū. <sup>11</sup> ?Akọ kọjeru unu lẹ nggele lanụ atsofutaje mini, atso uto-mini; bya atsofutakwaphu mini, atso age l'ugbo lanụ? <sup>12</sup> Unwunna mu; ?unu phujeru ẹke uchokoro mịru akpuru igbogo? ?T'unu phujeru ẹke ube mịru uchokoro? Ono kwaphu ẹge ẹ te ekutadu mini, atso uto-mini lẹ mmaswị.

### *Mmamiphe, shi l'imigwe*

<sup>13</sup> ?O nweru onye ọ dū l'ọ maru mmamiphe; nweru egomunggo l'unu ha? T'onye ono koshiedu iya l'ome umere ọma yele ome àgù, shi lẹ mmamiphe. <sup>14</sup> Teke bukwanu l'ọo ijimanya jiru unu obu; obu aburu unu age; unu aburu ndu mkpamenya; unu bẹ ejekwa otu onwunu ẹpha kẹ mmamiphe; kẹ l'ọ bu ẹjo-ire bẹ unu gude



mebyia okpobe okfu ono. <sup>15</sup> Egbe mmamiphe ono te eshikwa l'imigwe; o kwa mmamiphe ndiphe. E to shikwa Ume Nchileke l'eka; o kwa mmamiphe, shi Sétanu l'eka. <sup>16</sup> Iphe obu bu l'oo eke ijimanya; me mkpamanya no be mkpaka nokwaphu; to du egbe ejo iphe ta noru iya nu.

<sup>17</sup> Obenu le mmamiphe ophu shi l'imigwe be du iche. Mmamiphe ono be onye nweru iya nu duoberu mma; l'eme odo; l'eme onu-utso; l'ekweje t'a chia iphe l'idzu. Onye ono aphuru madzu imiko; nweru umere oma l'eke madzu no. E too kpochajedu mkpocha; ophu 'o budu okfuru-iche-eme-iche. <sup>18</sup> Akpuru ndu, edokwa edokwa amitaje bu ndzu, vudo nhamunha l'ifu Nchileke.

## 4

### *Oshita ndiphe onya*

<sup>1</sup> ?Bu awe be oba-phe mbà yele osephe okfu shigbaa unu? Eke ephe shigbaa unu bu l'iphe egu iya alofu unu ogvu ekpiri. ?To du iya bu iphe, unu eya alaji l'ehu unu? <sup>2</sup> Oobuje teke iphe agu unu; eka te eru iya unu; unu egude ke iphe ono gbua ochi; jia ijimanya: nkata te enwe okfu. Unu awata ose okfu; balahaa mba. Iphe agu unu; be unu ta aphujedu uzo iya; okfu l'unu ta asujedu Nchileke t'o nu iya unu. <sup>3</sup> Unu asuje t'a nu unu iphe; ta nu iya unu; ke l'iphe, unu vu l'obu gude arọ iya bu ejo oriri; ege unu ee-shi mee ehununu ehununu. <sup>4</sup> Unube ndu-a, e te gudedu ire ephe eka l'o bu unwanyi, eri ogori-a! ?Unu ta madu l'onye eshita iphe-otso-ena ke mgboko-a onya be buwa ohogu Nchileke?

Ọo ya bụ l'iphe bụ onye hataru tẹ yele ndiphe l'eshi ọnya emekwa onwiya ọhogu Nchileke. <sup>5</sup> ? T'unu arije l'iphe e deru l'ekwo okfu Nchileke bụ kẹ mmakanu uto? Bụ iya bụ ọphu sụru: “Lẹ Nchileke eko okopho ume ono, o yeru t'o buru l'ime ayi ono.” <sup>6</sup> Obenu lẹ ndu e gude ire ẹphe ẹka bẹ Nchileke anuje iphe-oma, ka nshinu. Ọo ya kparu iphe ekwo okfu Nchileke sụru:

“Lẹ Nchileke akfuchije ndu  
 eku onwẹphe ekuku ụzo.  
 Ndu ọphu wozitaru  
 onwẹphe ali; bẹ oomejeru  
 eze-iphe-oma.”\*

<sup>7</sup> Ọo ya bụ t'unu wota onwunu ye Nchileke l'eka. Unu kfuchia Obutuswe ụzo; unu aphụ l'ọo-gbaru unu ọso. <sup>8</sup> Unu byakfuta Nchileke ntse; unu aphụ l'ọo-byakfutakwaphu unu ntse. Unu kwọo onwunu ẹka unubẹ ndu ẹjo iphe. Unu mekwaa obu unu t'ọ dụ Nchileke mma unubẹ ndu obu agba ẹbo. <sup>9</sup> T'o rua unu l'ẹhu; t'aphụ ji unu obu. Unu kwaa ẹkwa; tẹ nchịchochi buru unu aphụ; ẹhu-ena aburu unu iphere. <sup>10</sup> Unu wozita onwunu ali l'ifu Nchileke; oo-gude ẹka iya wolia unu eli.

### *Aanma ọkwa k'okfurushi nwanna*

<sup>11</sup> Unwunna mu; unu be ekfurushijekwa ibe unu; onye ekfubyishi nwanna iya; m'ọ kwanu onye gude obu iya l'anma nwanna iya ikpe bẹ bukwa ekemu bẹ ookfubyishi; bukwaruphu ekemu l'onwiya b'o gbe ekpe ikpe. I - kpedekwanu ekemu ikpe; ọo ya bụ l'ẹ tii mehedu

\* **4:6** 4:6 Ẹtu 3:34.

iphe ekemu ono kfulu; gbahaa l'i b'wa onye ikpe. <sup>12</sup> O bu onye lanu nkinyi iya bu onye atuje ekemu; buru iya nkinyi iya bu onye ikpe. O bu iya nkinyi iya aduje ike dzofuta; buru iya aduje ike mebyia. ?Bu onye be irije l'i bu; nggube, onye anma ibe ngu ikpe?

### *Aanma okwa ke nsasa*

<sup>13</sup> Unu ngabe nchi unube ndu asuje: "Le ntanu m'o bu echile be unu e-je mkpukpu, du egaphu; noo l'eke ono mkpurophu afa; gbaa ngho; rita uru." <sup>14</sup> Obenu l'unu ta makwa ege echile adu. ?Bu ngunu be ndzu unu bu? Ndu unu dukwa l'o bu enwuru-oku, ekpolihuje; kpu tuu; a -nolephu nwanshi; yo phukashihu. <sup>15</sup> Iphe gbe gbaa t'unu kfujee bu: "O -buru uche-obu Nchileke be ayi a-nodu ndzu; gbaaru owaa; gbaaru ophu." <sup>16</sup> Obenu owaa be unu gbe etse etsetse; l'asashi nsasa. Unu ta madu l'egbe ekuku ono l'o ha bu ejo iphe.

<sup>17</sup> Oo ya bu; l'iphe bu onye machacharu-a iphe, du mma, gbaru iya l'ememe; to me iya b'o buakwa onye obu ome iphe du eji.

## 5

### *Okwa, aanmaru ndu nweru iphe*

<sup>1</sup> A bya abya nta-a le ke unube ndu nweru iphe. Unu ngabe nchi. Unu kwashia enyaminini; unu echia mkpu k'ejo aphu, a-byaru unu.

<sup>2</sup> Eku unu l'o ha be buakwa iphe reshihuru ereshihu. Ngwa unu; be nra ripyashigekwaru.

<sup>3</sup> Okpoga unu; me mkpola unu gbaakwaru egba.

Ọ bụ ẹgba iya ono e-vudo agba unu ekebe. Oo-kepyashi anụ-ẹhu unu l'ọ bụ ọku. Nta-a bẹ unu kparu ẹku kuberu onwunu l'ikperazu-wa. <sup>4</sup>Ndu, jeru unu ozi l'egu bẹ unu gudewa ugho kpmia ugwo, unu ga akfu ẹphe. Aphụ, ẹphe agu bẹ ruakwaru l'igwe; mkpu kẹ ndu, kpataru unu iphe unu meberu l'alị bẹ ngashịwaru Nchileke, bụ Ọkaribe-Kakota-Ike nchị angashị. <sup>5</sup>Unu buwa lẹ mgboko-a; tūsarū ẹhu; l'eriphe ọva ọva; emephelephu iphe charu unu l'okpoma. Unu riwaru; gbaa ẹbà l'ọ bụ anụ-ẹbà; chaa tọo; kwaberu mboku, ee-gbu unu. <sup>6</sup>Unu nmaru onye, doberu ẹka ndoo ikpe; woru iya gbua; to yeru unu onu.

*Ọta-nshi; mẹ okfu anụ Nchileke*

<sup>7</sup>Unwunna mu; ọo ya bụ t'unu takpelekwaphu nshi jeye teke Nnajiufu a-bya. Unu phūwaru ẹge onye ọoru okfu atajẹ nshi; kwaberu iphe o meberu l'alị. Ọotajẹ nshi; ngaberu mini ọdungu. Yọ taa nshi jeye l'uboku ephetu. <sup>8</sup>Unubedua; unu takwaphu nshi; obu esihu unu ike. Ishi iya aburu lẹ teke Nnajiufu a-bya dūakwa ntse.

<sup>9</sup>Unwunna mu; unu ba agujekwaru ibe unu aphụ ẹge Nchileke ẹ-te ekpedu unu ikpe. Unu lekwa l'onye ikpe nọkwa ntse.

<sup>10</sup>Unwunna mu; unu nyatajekwa ndu nk-fuchiru Nchileke, shi gude ẹpha Nnajiufu ayi kfu okfu. Unu gude ẹphe; mụta ọtaru iphe-ẹhuka nshi. <sup>11</sup>Unu eleenua: ọ kwa ndu taru nshi bẹ ayi ekuje ndu a ọoru onu-oma nū. Unu nūwaru ọta-nshi kẹ Jobu; unu anukwaaphu ẹge Nnajiufu gude kfua ya ugwo l'ikperazu. Lẹ

Nnajiufu bụ onye obu-imiko; bụkwaruphu ọ-  
gba-mkpu.

<sup>12</sup> Ọp̄hu katsuānu; ụnwunna mu; bụ t'unu be erijekwa angu. Ọp̄hu ọ dukwa iphe ọdo, unu egude ria angu: m'ọ bụ igwe; m'ọ bụ alị. Teke unu suru: "Iye" t'ọ bụkwaru: iye. Teke unu suru: "Wawa" t'ọ bụkwaru: wawa; k'ọp̄hu Nchileke ta anmadu unu ikpe.

<sup>13</sup> ?O nweru l'unu ha, onye eje iphe-ẹhuka? T'onye ọbu kfuru nụ Nchileke. ?O nweru l'unu ha onye ẹhu atso ẹna? T'onye ọbu gụa egvu; gude jaa Nchileke ajaja. <sup>14</sup> ?O nweru l'unu ha, onye iphe-ememe eme? T'onye ọbu kukoo ndu, e meru ọgurennya chọchi t'ẹp̄he bya ekfuru nụ Nchileke l'ifu iya. T'ẹp̄he gude ẹpha Nnajiufu wụa ya manụ l'ishi. <sup>15</sup> L'okfu, e kfuru nụ Nchileke; bya ekweta l'oo-me bẹ adzotakwa onye iphe-ememe eme; Nnajiufu e-me; yọ gbakerehu. Teke bụ l'o meru iphe dū ẹji bẹ aa-guru iya ẹya nvu.

<sup>16</sup> Ọo ya bụ; unu koshijeeru ibe unu iphe dū ẹji, unu meru. Unu kfujekwaruphu nụ Nchileke l'okfu ẹhu ibe unu; ẹge ee-me t'ẹhu dū unu mma. Okfu, onye doberu ẹka ndoo kfuru nụ Nchileke bẹ erejekwa; takposhia alị. <sup>17</sup> Eláyija; ?tọ bụdu madzụ, kfụ ẹka kfuru ọkpa ẹge ayịbedua kfụ? O kfuru nụ Nchileke kfushia ya ike; sụ t'igwe b'egeda mini l'alị. Kẹ mini aburu kperengu afa ẹto l'onwa ishingu. <sup>18</sup> Yọ bya ekfuru nụ Nchileke ọdo; igwe abya enwushi mini; iphe a kuru l'alị awata amishi ọdo.

<sup>19</sup> Ụnwunna mu; o -nweru l'unu ha onye shisweru ụzo l'okpuberu okfu ono; onye ọdo

edulata iya azụ l'ụzo, vudo nhamunha; <sup>20</sup> t'onye ono maru l'onye dulataru onye meru iphe dụ eji azụ t'ẹ b'o shishi ejo ụzo; onye ono, shisweru ụzo ono bẹ aa-dzọfuta obu iya l'ẹka ọnwu; gụkwaaru iya nvụ l'igweligwe iphe dụ eji.

**Bayiburu Ikwo**  
**Ikwo: Bayiburu Ikwo Bible**

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

3867ef4e-3384-5ab4-a937-63476bb8a7bb